

# Gas Malaysia catat untung suku pertama RM95.1 juta

Mei 18, 2023 @ 9:42pm



KUALA LUMPUR: Keuntungan bersih Gas Malaysia Bhd meningkat kepada RM95.10 juta pada suku pertama berakhir 31 Mac 2023 berbanding RM91.32 juta yang dicatatkan pada suku yang sama tahun lalu.

Hasil melonjak kepada RM2.44 bilion pada suku pertama 2023 daripada RM1.78 bilion sebelumnya, sejajar dengan purata harga jualan gas asli yang lebih tinggi, seiring dengan harga pasaran global, diimbangi oleh volum gas asli yang lebih rendah yang dijual pada suku semasa, katanya dalam makluman kepada Bursa Malaysia hari ini.

Kumpulan itu berkata peningkatan keuntungannya disebabkan terutamanya oleh keuntungan kasar yang lebih tinggi dan pendapatan kewangan yang lebih tinggi, sebahagiannya diimbangi oleh perbelanjaan pentadbiran yang lebih tinggi.

Mengenai prospek, ia berkata kumpulan itu akan terus mengambil langkah berhemat untuk mengekalkan kecekapan operasinya agar kekal berdaya saing dan mencari peluang untuk mengembangkan perniagaannya.

"Dengan langkah-langkah yang dilaksanakan, lembaga pengarah menjangkakan kumpulan itu akan memberikan prestasi yang memuaskan bagi tahun kewangan 2023 seiring dengan jangkaan pertumbuhan ekonomi domestik," katanya. – Bernama